



Suđenje pomoćniku ministra industrije i rudarstva TK

# Prikazan snimak na kojem se vidi kako Imamović uzima novac od Velagića

Novac je uzet od SIPA-e, označen je, fotografisan i predat Velagiću. On je dobio uputstva da primopredaja bude na otvorenom

Pomoćnik ministra optužen za primanje mita u procesu dodjele koncesija tuzlanskom preduzeću „Tuzla-kvarc“

Svjedočenjem istražitelja Državne agencije za istrage i zaštitu (SIPA) Nebojše Miletića jučer je u Općinskom sudu u Tuzli nastavljeno suđenje Bahiru Imamoviću, pomoćniku kantonalnog ministra industrije i rudarstva, optuženog za primanje mita u procesu dodjele koncesija tuzlanskom preduzeću „Tuzla-kvarc“.


Imamović je 7. maja 2015. godine od zamjenika direktora preduzeća „Tuzla-kvarc“ Zlatana Velagića kao protuuslugu za izdavanje dokumenata za dodjelu koncesije na eksploataciju

kvarcnog pijeska, o čemu je Vlada TK već bila donijela odluku, tražio da mu u tri navrata bude isplaćeno po 10.000 maraka.

Isplata prve rate, prema dogovoru, izvršena je u Velagićevom putničkom vozilu na parking u ispred tržnog centra „Tuš“ u Tuzli, kada su pripadnici SIPA-e Imamovića i lišili slobode.

Istražitelj Miletić detaljno je pojasnio kako se došlo do saznanja o ovom događaju.

- Novac je uzet od SIPA-e, označen je, fotografisan i predat Velagiću. On je



Optuženi i njegova odbrana zašutjeli kada je prikazan video

dobio uputstva da primopredaja bude na otvorenom i gdje nema puno ljudi. Mi

smo bili u drugom vozilu. Vidjeli smo kada Imamović ulazi u auto i slušali smo sve

šta se dešava, gdje je izvršena primopredaja novca – kazao je on, navodeći da su nakon izlaska iz Velagićevog automobila Imamovića uhapsili pripadnici SIPA-e.

Dok je Miletić svjedočio, Imamović i njegov advokat vrlo drskim upadicama pokušavali su na svaki način osporiti bjelodane činjenice o kojima je ovaj istražitelj govorio. Zašutjeli su onog trenutka kada je na ekranu prikazan videosnimak primopredaje novca, na kojem se vidi kako Imamović uzima novac od Velagića i gdje ga pohranjuje. **A.H.**